

AKASHVANI AIZAWL

REGIONAL NEWS UNIT

CONGRESS NAMES CANDIDATES FOR DAMPA BYPOLL

Mizoram Pradesh Congress Committee chuan vawiin khan Dampa bial MLA by-election lo awm tura an party candidate turin Pu John Rotluangliana an ruat thu an puang.

Candidate hi Congress President Pu Lal Thanzara'n vawiin khan an parry pisa Congress Bhavan ah a puang a, Dampa biala an candidate tur Pu John Rotluangliana hi MPCC Vice President ni lai a ni.

Pu John Rotluangliana hi nimin khan MPCC Vice President atan ruat a ni a, kum 1993 ah Lokichera bial ah MLA atan thlan tlin a ni a, kum 2008 leh kum 2013 MLA inthlanah Mamit bial atanga thlan tlin niin Deputy Speaker anih tawh bakah Supply, Transport leh Tourism Minister alo ni tawh bawk.

Dampa bialtu MLA Pu Lalrintluanga Sailo a boral avanga by-election neih turah hian sawrkar lai ZPM party chuan August ni 25 khan an party candidate atan Pu Vanlalsailova an lo puang tawh a, September ni 2 khan MNF Party chuan an party candidate atan Dr R. Lalthangliana an puang a, BJP Party pawhin candidate an nei dawn tih sawiin an puan hun tur erawh an la sawi lo a ni.



SAINIK DATA

Mizoram Sainik Welfare and Resettlement chhinchhiah danin tun dinhmunah Mizoram chhungah sipai bang, ex-servicemen sorkar-a inziaklut 6355 an awm mek.

Akashvani Aizawl zawhna chhangin Mizoram Sainik Welfare and Resettlement hotute chuan ex-servicemen 6355 an awm thu an sawi bakah ex-servicemen ten an kawppui an boralsan in ziaklut zat chu 2550 an tlin tawh thu an sawi a, indopui pahnihna hun laia sipai, World War 2 veteran Mizoram la dam zat chu pasarih an nih thu leh, indopui hnulaia an pasalte sipai a tangin an thihsan hmeithai chhinchhiah zat chu 222 an tlin thu an sawi bawk.

Kan correspondent report i lo ngaithla ang.

Mizoram Sainik Welfare and Resettlement chuan India sipai a tang pension ta te chhinchhiah leh an hamthatna hmuh theih ang ang lo bawhzui sak kawngah nasa takin ke an pen thin a, tun dinhmuna Mizoram Sainik-in a chhinchhiah danin indona avanga sipai ramtuileilo a chhuak chu Mizoram-ah 58 an awm bakah an pasalten indona avang leh an duty laia an boral san tak hmeithai 58 an awm mek bawk.



RTI

Mizoram Information Commission chhinchhiah danin, Mizoram chhung bikah kum 2006 atanga vawiin thlengin RTI act hmanga zawhna 43412 thehluh a ni tawh.

Mizoram Information Commission-in Akashvani Aizawl a hrilh danin, kumin sorkar tangka kumthar ni, April ni 1 atanga RTI act hmanga zawhna an dawn tawh chu 3162 a tling tawh a, Right to Information Act hmanga zawhna lut, sorkar lam atanga a chhanna duhkawp loh avanga zualko pawh kum 2006 atanga chhiarin mi 730 an awm thu leh heng an zualkona atanga chhanna an hmuh duhkawp loh avanga zualko nawn leh mi 197 an awm thu Mizoram Information Commission hotute hian an sawi bawk.

Mizoram Information Commission chhinchhiah danin Financial Year kalta chhung khan zawhna lut 7394 a awm a, hei hi RTI act hman tan a nih atanga zawhna luh tam ber kum a nih thu leh kum 2006 atanga chhut a kumin Financial Year tawp thlenga RTI act hmanga complain lut chhinchhiah zat chu 160 a nih thu Mizoram Information commission hotute chuan an sawi bawk.



AIR NEWS ON SOCIAL MEDIA

Chanchintha hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchintha hi ngaihthlak leh chhiar theih a dah a ni.

Zandin dar 6 leh a chanve-ah Chanchintha puan leh a ni ang.



HEALTH MINISTER

Health Minister Pi Lalrinpui'n vawiin khan a pisa ah Bal chungchang zirbingna “Research on Phytochemical constituents & galactagogue properties of Colocasia esculenta (taro) and determination of its nutritive value” report bu a tlangzarh.

Health Minister Pi Lalrinpui Mizo chaw lar tak bal zirchianna research a awm thei chu lawmawm a tih thu leh hemi kawnga hma latute chu fakawm a tih thu a sawi a. Bal chu Mizo nunphunga bet tlat a nih thu leh a thatna chi rang hrang tlang hriat mai ni lova, research hmang ngeia hmuh chhuah a ni chu a hlut hle tih a sawi a, sumdawna kawngah pawh a that bikna nena tarlan thlap a ni thei tur chu lawmawm a tih thu a sawi bawk a ni.

Mizoten thlai zinga kan ei lar tak Bal hi chaw tha a nih mai bakah nu hnute tui a ti tam thei tih sawi a awm avangin Mission Foundation Movement chuan zirchian tul an ti a. Ministry of Tribal Affair hnuaia Support to Tribal Research

Institute scheme hnuaiah kum 2022-23 chhung khan Social Welfare & Tribal Affairs kaltlanga research hna hi thawh a ni.



GST REFORMS

Ramchhunga chhiah khawn dan thar tur sawrkar laipuiin a duan ah Ministry of Electronics and Information Technology hnuaia electronic bungraw hrang hrang man bithliah chu mipuiten an hlawkpui dawn hle a, Digital India leh Aatmanirbhar Bharat hmathlir tih hlawhtin nan a pawimawh hle a ni.

Ministry of Electronics and IT GST tharah hian thil man hrang hrang a tlahniam dawn a, hei hian mipui nawlpuiin an mamawh awlsam zawka an lei theihna tur pe in man man zawkin an lei thei dawn a, dinhmun hniam awm ten an hlawkpui bakah mipui nunhpungah hmasawnna nasa zawk a thlen beisei a ni a, tualchhung thil hralhchhuah a pun beisei a ni bawk.



PM MODI

Prime Minister Narendra Modi hovin nimin khan Nepal ram buaina chungchangah Security meeting neih a ni a, Prime Minister chuan Nepal ram buaina leh thalai nunna chante chu pawl a tih thu sawiin remna leh muanna a duhsak thu a sawi.

India sawrkar chuan Nepal tualchhung buai avangin tun dinhmunah khualzinte tlawh rihlo turin a hriattir a, tuna Nepal ram a awm mek India mite pawh an sahimna ngaihtuah tur leh pawn chhuak lo tura chahin Nepal thuneitute bakah Kathmandu-a India Embassy atanga an thurawn te ngaipawimawh turin a chah a, Nepal Airport chu hun engemaw chen khar a nih avangin Nepal leh India inkalpawh na te khar vek rih a ni.

